



**SURUHANJAYA PILIHAN RAYA MALAYSIA**

## **SIARAN MEDIA**

### **SPR SAMBUT ULANGTAHUN PENUBUHAN KE 57 TAHUN**

**PUTRAJAYA, 04 September 2014** . Suruhanjaya Pilihan Raya (SPR) hari ini menyambut ulangtahun penubuhannya yang Ke 57 Tahun. Sempena sambutan itu, satu upacara ringkas dengan memotong kek ulangtahun telah diadakan. Upacara ini disempurnakan oleh Pengerusi SPR, Tan Sri Abdul Aziz Mohd Yusof. Turut serta dalam majlis itu adalah Ahli Suruhanjaya, Datuk Dr. P Manogran dan Setiausaha SPR, Datuk Abdul Ghani Salleh serta beberapa pegawai kanan.

SPR telah ditubuhkan pada 4 September 1957 mengikut Perkara 114 Perlembagaan Persekutuan. Di awal penubuhannya SPR hanya dianggotai oleh Pengerusi dan 2 orang Ahli Suruhanjaya. Pengerusi pertama Suruhanjaya adalah Dato' Dr. Mustafa Albakri Haji Hassan, manakala Ahli-ahlinya terdiri daripada Encik Lee Ewe Boon dan Encik Ditt Singh.

Selepas penubuhan Malaysia pada tahun 1963, bilangan Ahli Suruhanjaya ditambah kepada 3 orang lagi. Ahli tambahan itu sama ada dari Sabah atau Sarawak yang dilantik secara bergilir. Datuk Abang Haji Marzuki Nor dari Sarawak menjadi ahli pertama mewakili 2 negeri berkenaan. Manakala pada tahun 1981, pindaan ke atas Perkara 114 Perlembagaan Persekutuan dibuat bagi membolehkan pelantikan seorang Timbalan Pengerusi. Encik Abdul Rahman Abu Hassan merupakan orang pertama mengisi jawatan Timbalan Pengerusi. Manakala pada tahun 2002, pindaan kepada Perlembagaan Persekutuan diluluskan bagi menambah keanggotaan Suruhanjaya Pilihan Raya menjadi 7 orang iaitu seorang Pengerusi, seorang Timbalan Pengerusi dan 5 orang Ahli termasuk seorang ahli dari Sabah dan seorang ahli dari Sarawak. Bagi membolehkan Suruhanjaya menjalankan fungsinya, sebuah Urus Setia yang diketuai oleh seorang Setiausaha dibentuk. Setiausaha ini berperanan sebagai ketua pentadbir bagi urus setia berkenaan. Setiausaha pertama yang dilantik ialah Encik H. Cassidy yang berkhidmat dari tahun 1957 hingga 1958.

Sejak penubuhannya pada tahun 1957 sehingga sekarang, Ibu Pejabat Suruhanjaya telah beberapa kali berpindah lokasi pejabat. Lokasi pertama Ibu Pejabat SPR terletak di Bangunan Sultan Abdul Samad, Jalan Clark, Kuala

Lumpur. Kini, sejak November 2000, Ibu Pejabat SPR berada di Blok C7, Kompleks C, Putrajaya. SPR dijangka akan berpindah ke bangunan sendiri di precinct 2 pada tahun depan.

Antara fungsi utama SPR adalah menjalankan proses pilihanraya umum dan juga pilihan raya kecil. Selain itu Suruhanjaya juga berfungsi menjalankan urusan pendaftaran pemilih dan semakan daftar pemilih. Ia juga berperanan untuk membuat kajian dan persempadanan semula bahagian-bahagian Pilihan Raya Parlimen dan Negeri.

Dasar Suruhanjaya Pilihan Raya adalah untuk memelihara, menyelia dan mengekalkan proses demokrasi di negara ini melalui pilihan raya yang bebas dan adil. Adalah menjadi tanggungjawab Suruhanjaya bagi memastikan rakyat dapat memilih wakil-wakil mereka melalui undian terus dalam setiap pilihan raya.

Tan Sri Abdul Aziz berkata, sempena ulangtahun ke 57 ini, beliau mengucapkan terima kasih dan penghargaan kepada semua parti-parti politik, Badan Bukan Kerajaan (NGO), para pemimpin dan individu yang telah memberikan kerjasama dan membolehkan SPR menjalankan tugasnya sepertimana yang dikehendaki di bawah peruntukan Perlembagaan Malaysia dan undang-undang. Beliau juga berharap, kerjasama seperti itu dapat diteruskan pada masa akan datang untuk memperbaiki perjalanan pilihan raya pada masa akan datang.

PUTRAJAYA

04 September 2014

1.45 Petang

Dikeluarkan oleh:

**Unit Komunikasi Korporat**

**Suruhanjaya Pilihan Raya (SPR) Malaysia**

Aras 5, Blok C7, Pusat Pentadbiran Kerajaan Persekutuan

62690 PUTRAJAYA

Tel: 03-88856688 Faks: 03-88889113/ 88889117